

Gisela Stein

## De Kauh

Pauline Klatt hett Måg'weihdäch.  
Sei mütt tau Prüfung. Wat för'n Pläch!  
In Bio wier s' noch nie 'ne Lücht,  
bi Liehrer Krull nich vël vermücht.  
Wat wull de Kierl nich allens weiten!  
Dat bröcht nich blot Paulin' taun Sweiten.

De Dach is ran. Paulin' süht swart.  
Wat puckert lut ehr lüttes Hart!  
„De Kauh“! So'n Schiet! Dat gifft Verdross.  
Von dee hett s' keinen Animus.  
Nu sing man tau, nu sing man tau  
von Herrn Pasturn sien Kauh jau, jau!

Blot mit denn' Preister is man nicks.  
Sei mütt nu grüweln, un twor fix,  
wat allens hüürt taun „Körperbau“  
von disse brägenklüttrig Kauh.

Nu ist't sowiet! De Kommission  
sitt dor as up'n Richterthron.  
Sei möckt ganz wuschig nu Paulin'.  
Ehr nieges Kleed is smuck un fien.

Schu geht sei up dat Bild nu tau,  
dat grot dor bammelt von de Kauh,  
sortiert sei nu in grote Stücken,  
tauierst denn' Kopp, denn' Stiert un Rüggen.  
Sei ward ganz iewrig, kümmt in Fohrt.  
Wat hett Besünners noch de Oort?  
„Ach ja, das Euter ganz wichtig ist,  
sonst sieht die Kuh aus nach nicks, ganz trist.

Und dann... ja dann... ich hab's doch gewusst,  
ganz vorn bei der Kuh hängt noch die Brust.“  
Sei piekt bi de Kauh up denn' Slapperkram,  
dee vörn so rümhängt, ganz ahn Scham.





Blot Liehrer Krull is nich taufräden  
mit dat. Sei sall noch wiererräden.  
„Ich will nicht nur die Teile wissen,  
ich tu vor allem bei Ihnen missen,  
woans sich befinden die einzelnen Stücke.  
Ergänzen Sie bitte die Wissenslücke!“

Nu fangt Pauline an tau sweiten.  
Wat sall sei nich noch allens weiten!  
Verbiestert kickt sei up de Kauh.  
Nu sing man tau, nu sing man tau!  
De Kopp, de Stiert un ok de Bein,  
dat is je licht, kann jeder seihn.  
Dat Üter kann kein-ein verfählen.  
De döemlich Bost deit Line quälen.  
Bet wohen geht dee bi de Kauh?  
Nu sing man tau, nu sing man tau!

Krull springt nu up. Dat is de Höh!  
Dat weit sei nich? Herrjemineh!  
„Sie sind doch auch ein Säugetier  
so wie die Kuh und auch der Stier.  
Sitzt hier bei Ihnen denn die Brust?  
Ich dacht, Sie hätten das gewusst!“

Hei piekt Pauline up denn' Hals.  
De Liehrers grienen. Is dat all'ns,  
wat hei bi ehr nu demonstriert?  
Pauline is all ganz verstüürt.  
Wat will hei blot mit de oll Kauh?  
Oh sing mi tau, oh sing mi tau!  
Un hen un her sei fix sinniert  
von de mall Kauh na't Sögendiert.

Up eis ehr Ogen lüchten dull.  
 Sei hœgt sik wat un secht tau Krull:  
 „Ich weiß nun, warum von der Kuh  
 ich allens nipp nich wissen tu.  
 Ich sage Ihnen nun den Grund:

Wir hatten im Unterricht nur den Hund!“



### Wörterklärungen

Plattdeutsch	Hochdeutsch	Plattdeutsch	Hochdeutsch
Animus	Ahnung	bammeln	hängen
Besünners	Besonderes	brägenklütrig	leicht verrückt
iewrig	eifrig	Lücht	Leuchte
lüchten	leuchten	Mäch'weihdäch	Magenschmerzen
nipp	genau	Oort	Art
puckern	aufgeregt klopfen	schu	scheu
Stiert	Schwanz	sinnieren	nachdenken, grübeln
verbiestert	verstört	wuschig	verwirrt, nervös